

DRAGI MOJ JA,

DRAGA MOJA,

DRAGI MAMA I TATA, NAJDRAŽI MOJ

DRAGA MOJA,
DRAGI TATA I DRAGA MAMA,
DRAGA MAMA,
DRAGI PRIJATELJU, DRAGI MOJ JA,
DRAGA JEDANAESTOGODIŠNJA JA,

DRAGI MALO NIŽI JA,

DRAGI MAMA I TATA,

DRAGI TATA I DRAGA MAMA,

DRAGA M,

DRAGI MOJ JA,

IDAHOBIT 2021

DRAGI,

Pišem ti ovo jer znam kako se osjećaš. Znam da ti uopće ne želiš da se predstavljaš kao muško, ali moraš da izbjegneš strah i stigmu koja bi te susrela da se predstaviš drugačije. Razumijem te, jer si to i doživio kada si se predstavljao kao rodno neutralna osoba. I zbog različitih mišljenja i neprihvaćenosti si mislio da nisi normalan. Iako znaš da ti se ne sviđa kako ti se ljudi obraćaju i kako ti se ne sviđa tvoje tijelo, mislio si ako pokušaš utišati svoje emocije da će ti biti lakše. E ja ću ti reći da to nije istina.

Ne trebaš zakopati svoje emocije da bi bio prihvaćen. Uvijek će te pratiti te emocije i tvoje pravo ja. Ali tu sam ja da ti kažem šta se čeka. Samo ću ti reći da ćeš prihvatiti svoj identitet i da ćeš se predstavljati u skladu s tim. **Kada skupiš snage da se kreneš suočavati sa svojom disforijom, osjećat ćeš se kao najsnažnija osoba.** Kao nezaustavljava sila ćeš rješavati sve probleme i nakon mnogo godina ćeš biti sretna. Sve će biti super jer si hrabra i snažna. Napokon ćeš se osjećati slobodno i autentično, bez da moraš glumiti tko si. Iako će te mnogi napustiti, nećeš svoj identitet mijenjati da bi se uklopila negdje. Shvatit ćeš da ti ljudi nisu ni potrebni ako te osuđuju zbog tvoga “ja”.

Kako ja sve ovo znam? Ovo je tvoja buduća priča, i moja prošlost.

-Vanna

#IDAHOBIT 2021

Pročitajte više na lgbti.ba

DRAGA JEDANAESTOGODIŠNJA JA,

Nikom nećeš reći za onaj san. Znaš na što mislim, o onoj lijepoj ženi. Ne, neće te ničiji Bog, bog ili bogovi staviti na crnu listu i buzdovanom potjerati do pakla ili u što već vjeruješ, bar znam da si nekad vjerovala.

Je li počelo s tim snom? Ili je počelo još u vrtiću kad nisi mogla spavati pa si sve vrijeme gledala u Mijine kovrče i pitala se kako je ovakav svijet mogao stvoriti jedno tako savršeno biće? Ne vjerujem da su djeca u vrtiću sposobna zaljubiti se kao odrasli ljudi, ne vjerujem ni da se ti možeš zaljubiti na takav način. Sad još vjeruješ u onu filmsku ljubav, vjeruješ da si ti Rose koja će na brodu upoznati svog Jacka, mada je i ta „ljubav“ neslavno završila; možda si ipak Kat Stratford kojoj će Patrick pjevati „Can't Take My Eyes Off You.“

Voljela bih da možeš preskočiti taj zabludni proces odrastanja i odmah shvatiti da adrenalinska ovisnost o nekom nije ljubav, da život ne treba izgledati kao holivudska drama bez pozadinske muzike i da ne pripadaš drugim ljudima, već samoj sebi. No moram ti dozvoliti da odrastaš korak po korak, gurnem li te u svijet za koji nisi spremna, plašim se da ćeš se pretvoriti u jedno ogorčeno biće i da meni nećeš dozvoliti da postojim.

Za četiri godine sve ovo o čemu pišem imat će smisla (tad će se ovo što osjećaš prvi put odnositi na stvarnu osobu). Sad te ne mogu zaštiti od nekih unutarnjih zvijeri i onih koje povremeno vrebaju spolja. Uz njih ćeš naučiti koliko je zapravo bitno da pripadaš samoj sebi i da vjeruješ, da bezuvjetno vjeruješ onom glasu koji često odjekne negdje iznutra govoreći da nešto nije u redu ili pak da jeste.

Ono što doista volim kod tebe je to što ti je trebalo samo nekoliko dana da lijepoj ženi dozvoliš da ostane u twojоj glavi (o njoj ćemo nekom drugom prilikom), nekim ljudima su potrebne godine da prigrle taj dio sebe (i to je u redu). Današnji svijet je takav da zahtijeva objašnjenja jednostavnih stvari i drago mi je što se ne osjećaš dužnom da objašnjavaš svoja lutanja i povremena otkrića. Ostat ćeš takva i nekoliko godina kasnije kad se slučajno sretneš sama sa sobom negdje na ulici.

„To sam ja“, reći ćeš svijetu koji će se zbumjeno pretvoriti u eho upitnika koji će tvoju sigurnost interpretirati kao hirovitost. Odmahnut ćeš im i otici dalje, onim putem koji ti dozvoljava da sebe objasnjavaš sebi i da budeš sretna.

Uvijek će se naći oni koji će sumnjati u prirodnost onog što osjećaš, ali želim da znaš da ne ovisiš o njima. Jednako si stvarna koliko i oni. Ako dozvoliš sebi da živiš neovisno o drugima, možda i oni nauče živjeti neovisno o tebi.

Znam da je možda sebično što ti zahvaljujem na onom što sad proživljavaš, ali kad vidiš svoj život za dvanaest godina, razumjet ćeš.

Zauvijek tvoja,
M.

IDAHOBIT 2021

Pročitajte više na [lgbti.ba](#)

DRAGA MAMA,

Voljela bih da znaš da mi znači kada staješ na moju stranu kada me ostatak porodice odbacuje i ruži. Znam da nije tebi nimalo lako da slušaš šta svi govore o tvojoj kćeri i da zagovaraš nešto što ni tebi samoj baš nije najjasnije. Znaj da sam ti zahvalna jer brineš o meni i jer si tu uz mene.

Tako bih voljela da si malo više dio moga života. Pa da mogu da ti kažem koliko se plašim kada idem ulicom i kada vidim grupu momaka. Koliko mi je to nelagodan osjećaj jer tada uvijek pomislim da će me napasti ili dobaciti neku uvredu jer izgledam kao lezbejka.

Voljela bih da ti mogu ispričati kako više ne uživam u slušanju muzike dok šetam gradom. U stvari, kako ne nosim slušalice u ušima uopšte od kako su mi na ulici prijetili da će me ubiti samo jer sam šetala gradom i držala se za ruke sa djevojkom. Nedostajala mi je twoja ljubav i podrška u tom periodu, ali ti za to nisam mogla reći jer mi se to desilo zbog toga što sam se držala za ruke za ženom. **A ti ne znaš da se ja držim za ruke sa ženama, niti to da ja žene volim.**

I želim da ti pričam o tome kako me oduševila izvedba Damira Imamovića pjesme "Dva se draga" i da ti kažem da nama ikada nije bilo nije lahko živjeti u našem društvu i da zbog toga nekada razmišljam o odlasku.

Ali, i prije svega toga, najviše bih voljela da ti mogu otvoreno pričati koliko mi je lijepo sa Njom. Koliko mi je svijet ljepši uz Nju. Koliko je volim I kako želim graditi život sa Njom. Znaš, čak vidim nas dvije, naše dijete, psa i hrpu biljaka u vjerovatno nekom iznajmljenom stanu u nekoj, nadam se, ne toliko dalekoj budućnosti. Nekada maštam kako Ona i ja kupujemo tebi i babi poklone za rođendane, pa kako idemo sa vama otkrivati svijet i kušati raznu hranu. Razmišljam i okupa me tada osjećaj sreće o tome koliko bi bilo lijepo da i Ona bude dio porodičnih okupljanja za praznike.

Najčešće maštam o tome da prihvate mene koja voli ženu onako kako ste prihvatali sina koji voli ženu i drugu kćerku koja voli muškarca.

-Tvoja A.

#IDAHOBIT 2021

Pročitajte više na lgbti.ba

DRAGA MOJA,

Godina je 2011., treći si srednje, Ke\$ha pere zube Jack Danielsom, a Bosna je u nekoj krizi.

Eh, kod mene je 2021., druga smo godina doktorskih studija, Ke\$ha govorí o zlostavljanju koje je preživje-
la, ali neka nam barem država nije opet u recesiji.

Skrila sam jednu tajnu od tebe, draga moja, ali ne znam da li treba da ti je odam. Za koju godinu ćeš i sama
saznati istinu, jednostavnu i šarenu, iako još živiš u blaženom neznanju. Nikad ti nije palo na pamet da si ti
jedna od tih ljudi. I tebi je jasno da nema ništa loše u tome, samo to nisi ti, naravno. Kako bi mogla biti?
Takvi ljudi čine ti se ekscentrični, impresivni u svojoj hrabrosti i želji da budu ono što jesu, a ti si samo
jedan povučeni šmokljan. Jedini momak koji ti se iole svđao bio je šljaštavo-vampirske orijentacije, ali,
bože mili, nemati simpatiju, a kamoli vezu u srednjoj nije smak svijeta. Drugarice misle da su ti starci strogi,
a ti ih ne ispravljaš u zabludi.

Hoću da saznaš svoju istinu, jer ona sa sobom nosi slobodu, divne uspomene, prijatelje i skandalozna
držanja za ruke. Želim ti reći, jer zaslужuješ da znaš ovu osnovnu stvar o sebi, ali onda se sjetim iskustava
onih koji su tu istu tajnu saznali ranije nego što ćeš ti. Biti drugačiji u tako ranjivo doba teško je i u najbol-
jim uslovima, a mali grad u Bosni prije deset godina ne može biti dalje od idealnog. Ta ista istina je mnogi-
ma donijela bola, uvrede i nasilje. Neki su ostali bez porodice, prijatelja, bez ekonomске sigurnosti. One
koji su ostali bez života nikad neće imati priliku upoznati.

Ti to nećeš iskusiti. Tišina će te sačuvati, ali će te i sakriti od svih dobrih stvari koje sloboda donosi. De-
cenija koja je ispred tebe neće biti laka. Čeka te razmišljanje, zbumjenost i prvi pokušaji priznavanja. Čeka te
slomljeno srce. Našu tajnu smo sakrile, možda i isuviše dobro. Činila nam se toliko skandalozna, prljava,
iako to nikad nije ni bila, iako smo dobro znale i da ona to nije. Ali, racionalni dio uma često je u zavadi sa
emocijama.

Žao mi je što živimo u svijetu gdje su, ponekad mi se čini, ove dvije opcije i dalje jedine za ljude kao što
smo mi. Žao mi je što jos uvijek nije došlo vrijeme kada naša tajna neće niti vrijedna spomena, a kamoli
skrivanja. Ali, ko zna šta ova decenija donosi?

Nadam se da je naša verzija iz 2031. godine doktor nauka, da Ke\$ha i dalje pjeva dobre pjesme, a da nam je
Bosna napokon izašla iz krize. **Nadam se da živimo u svijetu u kome se ne moramo skrivati, okruže-
ni ljudima koje volimo.**

Ostavljam te u tvojoj nadasve zanimljivoj deceniji. Kad napustiš svoj balon sigurnosti, neće ti biti lako, ali
samo znaj da te čekam na drugoj stani i da sam sretna. Nije lako, ali izdrži u naše ime. Vrijedit će. Bićemo
ok.

Voli te tvoja ti

#IDAHOBIT 2021

Pročitajte više na lgbti.ba

DRAGI MALO NIŽI JA,

Postoji mnogo togā što ti želim reći, ali ču to učiniti kratko i jasno, kako bi ti bolje shvatio.

Život je dobar. Ne uvijek, ali je dobar. Od tvoga samog rođenja ljudi te gledaju drugačije, i rijetko ko te zapravo i razumije. Ali nisi sam, nikad nisi bio, ali to ćeš shvatiti tek kasnije, shvatit ćeš to kada bude vrijeme. Dok budeš odrastao imat ćeš mnogo izazova, od svoje teške bolesti pa sve do svoje "različitosti". Bit ču iskren, neće biti lako doći ovdje gdje sada jesи, ali uz mnogo truda i rada ćeš uspjeti.

Život je jedan put. Tvoj put je trnovit, ostavit će ožiljke ali ćeš ipak osjetiti i miris ruža. Bit ćeš okružen različitim ljudima koji te baš i ne razumiju, koji će pokušati da ugase tvoj sjaj. U jednom trentku će skoro i biti ugašen, ali tvoja želja to neće dopustiti, pa ćeš sijati još i više. Nemoj da te bude strah da se boriš za sebe i za ono što misliš da je najbolje za tebe... Vjeruj mi, nakon mnogo godina borbe sa drugima, a i sa samim sobom, sve će bolje biti. Kada otkriješ i prihvatiš sebe život će ti početi. Kada pronađeš ono što voliš i želiš da radiš, postavit ćeš ogromne ciljeve, ali ćeš ih i ostvariti, neke ranije, neke kasnije, a neki još čekaju da budu ostvareni.

Ali polako, ne žurimo se. Tvoja dobrota, nježnost, kreativnost i ambicioznost će biti ključ tvog uspjeha i sreće. Bit ćeš okružen divnim prijateljima koji te vole, razumiju i podržavaju. **Tvoja izabrana poriodica je uvijek tu uz tebe. Tvoja mama će biti tu za tebe, pokaži joj koliko ti znači.** Pokaži joj ljubav, kao što i ona tebi pokazuje istu.

Budi dobar, imaj hrabrosti i vjeruj.

#IDAHOBIT 2021

Pročitajte više na lgbti.ba

DRAGI TATA I DRAGA MAMA,

Kada ste saznali da sam lezbejka, moj svijet se okrenuo naopačke. Izgledali ste kao da ste izgubili percepciju one male mene koja je još uvijek tu sa vama. Voljela bih da još uvijek znate da sam ista ona djevojčica koja sam bila i prije. Još uvijek se plašim pauka, mraka, doktora i zmija. Još uvijek poželim da vam dotrčim u naručje kada me nešto rastuži, prepadne ili naljuti.

Do sada nisam imala snage u sebi, ali kroz ovo pismo želim iskreno da vam oprostim. Oprashtam vam što niste bili u mogućnosti da mi pružite ljubav, sigurnost i razumijevanje. Oprashtam vam što sam, sad skoro više od pola života i svih njegovih prepreka, prolazila sama. Oprashtam vam što sam vas izgubila sa svojih 15. godina. Oprashtam vam što je mala Dina bila izgubljena, bezvrijedna i uplašena. **Javno kroz ovo pismo, kao ono što sam dobila od vas da me se odričete, vam oprashtam.**

Sada ћу за крај овога писма да се обратим малој Дини.

Za nju: **Naš identitet lezbejke je validan, vrijedan i lijep.** Nemoj ga se stidjeti. Nikada ga se nećemo odreći jer ne želimo! Ponosno ćemo ga nositi nas dvije.

U potpisu i sa puno ljubavi,

-Dina

IDAHOBIT 2021

Pročitajte više na [lgbti.ba](#)

DRAGI MAMA I TATA,

Zahvalna sam na svemu što ste mi pružili. Vaspitanje i odgoj zbog kojih sam većinski sada ono što jesam, bezuslovnu podršku i ljubav tokom odrastanja čak i kad sam imala neke svoje momente. Zahvalna sam što ste bili dovoljno snažni i hrabri da sestri i meni obezbjedite bolji život u većem gradu sa više mogućnosti. Da samo znate koliko ste mi olakšali život...

Život mi je ljepši jer sam ovdje upoznala više ljudi kao što sam ja, ni u jednom momentu se nisam osjećala odbačeno. **Voljela bih nekada da vam ispričam kako sam pronašla sebe i kako sam se prvi put istinski zaljubila, ali u djevojku.** Vjerovatno znate da mi nije bila samo drugarica, čak je i sestra sama povezala.

Hvala što i dalje prihvivate sve moje izbore i podržavate me u svemu što radim, ali najviše bih voljela da jednog dana mogu da vam predstavim meni najbližu osobu kao moju djevojku sa kojom želim da živim uskoro.

Nisam još sigurna kako ćete reagovati kada vam to kažem otvoreno, ali voljela bih jednog dana da upoznate i ovaj dio mene. Ne bih voljela da nekad kasnije pomislim kako me nikada niste poznavali u potpunosti. Zaslužili ste da me poznajete.

Vaša starija kćerka,

-Mica

IDAHOBIT 2021

Pročitajte više na [lgbti.ba](#)

DRAGA M.,

Imaš 15 godina, stojiš pred svojim roditeljima i spremaš se da izgovoriš te tri riječi koje si nebrojeno puta šapnula svom odrazu u ogledalu vježbajući za ovaj trenutak. Pitaš se da li će se tvoj odnos sa dvoje ljudi koji su ti najbliži na ovome svijetu promijeniti nakon što popuniš neugodnu tišinu rijećima. **Mama, tata, ja sam gej.** Strah te je jer ne znaš šta će se dogoditi kasnije, kako bi i znala - ali ja znam, I bit ćeš u redu.

Proći ćeš kroz mnoge faze pokušaja svojih roditelja da te razumiju. Jedna od njih bit će i da im objasniš da ono što osjećaš nije faza već bitan dio tebe i svega onoga što jesi, jer ljubav koju nosimo prema drugima zauvijek ostaje nešto najbitnije što možemo da osjetimo i uradimo u ovome životu. Nemoj to nikada zaboraviti i dopusti sebi da osjećaš.

Situacija neće biti idealna, nije ni danas, ali s vremenom će postajati lakše. Bit će dosta svađa, suza i neshvatanja sa obje strane. Ti ćeš misliti da je to šteta jer je ustvari trebalo da oni budu na tvojoj strani. Kasnije kroz godine shvatit ćeš da možda i jesu na tvojoj strani ali da je i njih na početku bilo strah, baš kao i tebe. Sestra će ti biti podrška od samog početka. I itako ćeš znati da imaš nekoga ko je tu za cijeli život.

Doživjet ćeš neke divne momente sa dragim ljudima, svi tvoji prijatelji bit će ti velika podrška, i znam da je teško za povjerovati ali za nekih desetak godina održat će se prva povorka ponosa u tvome gradu. Tvoje Sarajevo u duginim bojama i ti u njemu okružena ljubavlju i prijateljima. Upoznat ćeš i mnogo aktivista_kinja, kao i ljudi iz zajednice i tu ćeš sklopiti predivna prijateljstva. Jedni drugima bit ćete podrška, radit ćete zajedno divne stvari i sav taj strah koji si nekada imala pretvorit će se u želju da se boriš i praviš bitne promjene u društvu oko sebe.

Zato znaj da to što osjećaš trenutno neće biti zauvijek i ne zaboravi da sve u životu što je istinski ispunjujuće vrijedno je borbe.

P.S. Ljubav pomjera granice. Stvarno je tako.

P.P.S. Počni da čitaš Bukowskog ranije.

-M

IDAHOBIT 2021

Pročitajte više na [lgbti.ba](#)

DRAGI PRIJATELJU,

Prisjećam se dana kada smo sjedili prijateljica, ti i ja u kafiću na zadnjem spratu hotela Mel-lain. Naša (draga) prijateljica je odlučila da probije led u moje ime i uhvatila me nesprem-nog kada je u ime vas dvoje pitala da li sam gej, iako je ona znala da jesam. **Sjećam se panike, srama i tjeskobe koju sam osjećao kad se pred mene postavilo očekivanje da odgovorim na pitanje, sve zbog misli da će izgubiti tebe kao najboljeg prijatelja.**

Preko 15 godina našeg prijateljstva visilo je o koncu, kontam šta da odgovorim.

Sjećam se da nam je ovako nekako tekao razgovor:

Ja: "Pa, da, jesam zapravo."

Ti: "Bolan, što mi nisi rekao prije? Pa ti si mi najbolji jaran, ne znam šta da si, ne bi nam sjebalo prijateljstvo"

Ja: "Šta ču ja, bilo me strah da čemo prekinuti prijateljstvo" – rekao sam ti sa olakšanjem. Suze nisu potekle, ali bi ih vjerovatno bilo da smo tada, prije 4-5 godina, razvili zdraviji maskulinitet kakvog imamo danas hahah.

Prijateljica: "Hajde sad nam pričaj, šta, kako, imaš li koga, sve nam pričaj!" – reče nam prijateljica koju sam gledao poprijeko (na šaljiv način) jer je glumila da ne zna da sam gej, ali kojoj sam zahvalan što je probila led, jer sam joj prethodno rekao da mi je potrebno da me neko pogura.

Gledajući prijateljstva koja ljudi imaju oko mene, mogu reći da je ogromna privilegija imati prijatelja s kojim sam zajedno fizički i karakterno rastao, pronalazio različite hobije i s kojim imam obostrano i apsolutno bezuslovno prihvatanje svih dijelova našeg sopstva.

Hvala ti na svemu i radujem se tvom vjenčanju u septembru, isto kao što se ti raduješ mojem useljenju u novi stan, i uzbuden sam da skupa proživimo sve naredne korake života. Zvući cringe ovo što ču reći, ali je istina: činiš moj život bogatijim i zahvalan sam što smo najbolji prijatelji skoro dvadeset godina.

-Alen Vračar

IDAHOBIT 2021

Pročitajte više na [lgbti.ba](#)

NAJDRAŽI MOJ,

Stani. Uživaj u svakom momentu. Možda se trenutno život čini loš, možda misliš kako nema izlaza, ali jedino čega nema je potrebe za panicom. Taj prijatelj koji je rekao da ne želi da se druži sa tobom jer nisi u kalupu ti nije prijatelj. Taj kolega koji ti kaže da si curica jer su ti procurile gole slike je zatucan. Profesorica koja s podsmijehom govori kako gotovo da nema muškaraca na ovom jezičkom smjeru, značajno gledajući u tebe, nije primjer dobre prakse. Svi oni su momenti koje moraš progutati da bi ti bilo bolje. Da bi rastao, osnažio se i napredovao. Progutaj pred njima svoj bijes, ali iskrenim, dobronamjernim ljudima oko sebi ispričaj kako se osjećaš. Jer, svi osjećamo, lažeš se da te ne pogađa.

Znam da si bijesan. Nikad ne na sebe i svoju istinu, uvijek na društvo. Bolesno, tužno i pomalo smiješno društvo. Ono koje u konačnici ne prihvata sebe. Društvo u kojem nećeš željeti biti dok ne shvatiš da ga možeš promijeniti. Možeš ga obojiti svim bojama koje voliš, praviti svoja pravila i norme. Svoje normalno. **Možeš napraviti svoj mali balon ljubavi u društvu punom mržnje. I biti sretan.**

Voli i budi voljen,
-Tvoj A.

#IDAHOBIT 2021

Pročitajte više na lgbti.ba

DRAGI MOJ JA,

Izvini što te ometam u učenju procesa čelijske diobe, vježbanju integrala ili nekoj drugoj gluposti za koju si mislio da će ti biti neophodna u životu. Vjeruj mi, ništa od toga ti neće trebati. Govorim ti iz iskustva.

Javljam ti se samo kako bih ti rekao kako su sve stvari oko kojih se sada sekiraš prošle bolje nego što si mislio. Nakon što sam prihvatiš da si gej i počneš to dijeliti sa drugima, iz života će ti polahko početi nestajati sve dvolične osobe, a broj ljudi kojima je stalo do tebe iznenađujuće porasti. Prirodno je da te bude strah ove promjene, ali ćeš vremenom naučiti cijeniti jedno pravo prijateljstvo mnogo više od sto neiskrenih.

Ići ćeš na nezaboravna putovanja, učit ćeš o stvarima koje su te oduvijek intrigirale i rast ćeš kao osoba iz dana u dan. Polahko ćeš se prestati mrziti. Shvatit ćeš da je život samo jedan i danemaš toliko vremena da ga trošиш na bilo šta drugo osim na ispunjavanje svojih snova.

Bit će mnoštvo trenutaka za koje ćeš poželjeti da traju čitavu vječnost. Bit će i onih koji će ti godinama tjerati suže na oči. Zaljubljivat ćeš se i odljubljivati. Osoba sa kojom si dijelio život, preko noći će postati neko koga tek pozdraviš kad ga sretneš. Grijesit ćeš, povrijedit ćeš ljude do kojih ti je stalo, a i sam ćeš biti povrijedjen. Put koji ti predstoji nije lagan, ali će se svaki korak koji napraviš na njemu isplatiti!

Činjenica da si gej zaista će ti drastično promijeniti život, ali na bolje. Ljudi oko tebe će saznati za tvoju seksualnost, ali te neće odbacili nego će te prihvati. Proces suočavanja sa samim sobom će biti bolan, ali ćeš na kraju steći vjeru u sebe. I da, i u budućnosti ćeš grcikati nokte, tu ti zaista ne mogu reći ništa pozitivno...

Ukratko, ne sekiraj se toliko, sve će na kraju sjesti na svoje mjesto. Ne troši svoje živce na ljude do kojih ti nije stalo. Počni se ponašati onako kako ti želiš, a ne kako misliš da bi se drugima sviđalo. Duguješ sebi da proživiš ovaj život na najbolji mogući način.

Dobar si čovjek, ne daj da te iko uvjeri u suprotno!

Volim te puno,
Tvoj budući ti

P.S. Ako uštediš kakvih para do 2017. godine, kladi se da će Portugal pobijediti na Eurosongu.

Znam, i meni ovo zvuči nemoguće, ali samo uradi ovo što ti rekoh i bit ćeš mi zahvalan!

#IDAHOBIT 2021

Pročitajte više na lgbti.ba

DRAGI_E SUGRAĐANI_KE,

Neka bude ljubavi za ovaj 17. maj jer mislim da svijet je preumoran od mržnje i nasilja.
Barem ja jesam, ponekad.

Kao pravnik mogao bih krenuti pisati Vam ovo pismo pravničkim jezikom, govoriti kako je nasilje i mržnja krivično djelo, te kako prema međunarodnim aktima, dužni smo kao država i društvo da poštujemo sve jednako, pa tako i LGBTIQ osobe.

Međutim, nekako se sve svede na to da ljubav je ljubav. Volio bih kada bi mogli_e posvjedočiti kada sam se prvi put zaljubio u njega. Taj prvi susret je isti kao i Vaš kada ste se prvi put zaljubili_e. Nasmiješ se iako ništa nije rekao smiješno, želiš da znaš o njegovoj prošlosti, sadašnjosti, kao i željama za budućnost. Zagledaš se i shvatiš koliko je divno da je neko tu uz tebe i za tebe. Ne on ili ona. Ponavljam neko tu uz tebe i za tebe.

Kako bi još divnije bilo da smo se mogli uhvatiti za ruke dok hodamo gradom. Ne zato što je to nešto uobičajeno da parovi rade, jer zato što je bilo dosta hladnih noći kada smo šetali kao „dva prijatelja“. Međutim on me je grijao svojim riječima i pogledima. Mislim da znate kako to ide kad ste zaljubljeni_e. Nije svejedno bilo paziti kako i gdje izgovoriti riječi poput „ljubavi“ ili „volim te“. Pazio sam obavezno da li neko ima iza nas ili ispred nas. Iako nije bitno kojom jačinom glasa sam izgovorao te riječi, bitno je bilo da sam ih mogao reći dosta više puta, a nisam. Zato što je znala proći grupa ljudi za koju sam znao ili za koju sam sumnjao da ne bi razumjela moje „ljubavi“ ili „volim te“.

Kako bi još divnije od glasnog „volim te“ ili „ljubavi“ u javnom prostoru bilo to da smo mogli ozakoniti našu ljubav. Međutim nismo. U Bosni i Hercegovini ne priznaju moje osjećaje iskrenog osmijeha prema njemu, ne priznaju moje težnje da znam o njegovoj prošlosti, sadašnjosti, kao i željama za budućnost. Ne priznaju da neko bude tu uz tebe i za tebe. Istospolne zajednice se ne priznaju, nevidljive su i nepostojeće su.

Međutim kao što sam rekao kad bi samo mogli_e posvjedočiti kada sam se prvi put zaljubio u njega. Ako bi bili svjedoci_kinje te noći, bez imalo predrasuda i stereotipa i vi biste započinjali_e pismo meni rijećima „Neka bude ljubavi!“.

-Amar Ćatović

IDAHOBIT 2021

Pročitajte više na [lgbti.ba](#)